

Lès cîs du L'Forêt

Gaston Lucy-Echos de la Cité - 12 Décembre 1968.

Tout l'monde sét bin ku lès cîs du L'Forêt n'ont jamwês stés rnoumés pa leus vèjins pou leu malice.

Du ç'timps-là, l'èglîje du L'Forêt , la vîe, k'ére pus basse ku çti-cile, avot l'tèt à lôdje; i gn avot dès trôs d' tous les costés et l'consèy du fabrike ére bin pôve.

Il avint fwêt ène pourcession à Sint Rêmond, à Mèrny ; sondjèz don, tous les couchèts du viadje toûrnint.

Il î alint co avu des tchârs à bûs; is n'alint nin vite, don ! Is dvint tchanter des cantikes et dîre leu tchaplèt t'â dulon dul vôle.

I n' plint s' arêter k' ène-dumi-eûre à Wâjî, et co dmèrer stampés tins k'i mwindjint. Pou ruvnu, il astint libes.

Bramint des z-ôtes djins des viadjes èyusse k'i passint, nn'alint avu zès, si bin k' arivés à Mèrny, il astint dpus d' à 400. Les Maltons (soubricot des djins d'Mèrny) su dmandint bin çè k' i gn avot su la Smwas, i n' avint jamwês vu ça.

Ruvnans à noste èglîje. Avu les trôs du tèt et les vites brîjîes, ç'astot plin d'courants d'êr et coume i gn avot dins l'èglîje des Sints ki n'astint ni fwârt abiyîs, onz è yu peu k' i n' purdinjent frèd. Et onz è dit: On va covru lès trôs avu dul paye.

Et dj' vous l'dis: Ça f'jot, drole, in tèt d'paye et du scayes.

Lu timps passot, les sous dèpansés al pourcession nu ruvnint nin et les rèparacions n' avint nin sté pus lon.

Et, ç'ki fât co dîre, c'èst k' les pômes du swaye n'avint nin sté trop bin batues; i gn a dmèrot des grins k'avint djèrmé, si bin ku l'tèt è vite rusanné à in pachi.

Les portchîs, les bourdjwas, tous les Forijots, kwè, ruwêtint ça avu des oûys coume des cèkes du tounê.

Is discutint atère zès:

- On n' put nin lêchî ça insi ! I fât fwêre yâk !, dijot-i yink

- C'est d' fâchi la fôrèye, djot-i ène ôte.

Vous n'î sondjèz nin, djot-i l'trwâjime, montans ène vatche su l'tèt !

Après z-awè bin discuté (dins l'voûde), il ont tiré al buche, lu cî ki mètrot la vatche.

Mês, cand la vatche è arivé, coumint s' î prinde pou l'awè là-hiôt ? Il ont co discuté in bon moumint, pîs yink è vnu avu ène grande cwåde, l' ôte è apwarté ène poulie, pou l' acrotchî ou mèr du clotchî, et les z-ôtes ont vnu avu dès chômes.

Il ont don loyî la cwåde ou cô dul vatche, il ont fwêt passer la cwåde dins la poulie, pîs il ont cminçî à hatchî. La vatche è cminçî à monter tout douçmint, pîs la cwåde s'è sêré in pô, c'èst ki fjot tirer la langue al vatche.

- Wêtèz, d'jint-i les badôs, ile sint djà la fôréye, ile tind djà la langue après..

Il avint tant tiré, la cwåde s'avot tant sêré ou cô, ku cand la vatche è arivé al coupète, ile astot oûte. Mês, dvant d' passer, ile avot lêchî tumer ène grosse flate su l' sè d' l' uch.

Il' ont arivé tourtous vèy la flate, k'ére si mâ mètue.

Il ont intré ou tchapistrê pour prinde ène dècision avu la flate. On n'plot nin la lêchî là; i falot trouver ène solution ou problème. !

C'èst adon ku yink du zès è propôsé d' poussî l'èglîje in pô pus lon.

- A l'ovradje, dabôrd, ont-i dit ! Tant k' dju sans tourtous assan.ne. Falot vèy crankiyî les molèts des djonnes ki poûssint.

A fwâce du fwêre, i g'nè yink k'è cri.yî :

- Couradje, les amis, dju la sins ki rcule !

I n'avot nin vû k'i v'not d'riguer s'la flate.

Gaston LUCY

Raponti.yî pa Louwis Bêdjot, à Grêde, le 23 Julièt 1996.